

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 60 (1975)

Heft: 4

Artikel: Igl affon e siu lungatg

Autor: Cathomas, Bernard

DOI: <https://doi.org/10.5169/seals-882386>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Igl affon e siu lungatg

da Bernard Cathomas

Carstgaun e lungatg

Il lungatg ei ina dellas pli impurtontas habilitads che distinguan il carstgaun de tuts auters primats. Bein existan era el reginavel dils animals diversas pusseivladads de communicaziun (aviuls sultán, utschals e peschs van en roschs, animals selvadis han bien fried). In paregl cul lungatg dil carstgaun ei denton sclaus. Il carstgaun ei la suletta creatira che dat in num special allas caussas che circumdeschan el oz, che sa raquintar de quei ch'ei stau ier ed exprimer sias reflexiuns sur dil damaun. Il carstgaun sa buca mo repeter automaticamein enzacontas flosclas stereotipas sco il papagagi, el sa buca mo far ghegnas e dar buorls sco la schemia. Siu lungatg ei in sistem ordvart differenziau ed exact.

Co sa in affon emprender aschi spert e schi levamein il diever d'in instrument aschi complex sco il lungatg? Quei misteri ha occupau e fatg surstar ils carstgauns gia da vegl enneu. – La habilitad pil lungatg ei dada da natira e fundada biologicamein al centrum per lungatg de nies tschurvi. Mintga carstgaun ei pia predisponius per emprender lungatg e vul e sto emprender in tal per saver cuntentar siu basegns de seconversar e se-communicar ella societad. Il lungatg resorta dal patratg, dalla natira spiritala dil carstgaun. El lungatg daventa il patratg plaid ed ei aschia accessibels al concarstgaun. Gia cun 3–4 onns ei igl affon, grazia a siu lungatg, carschius viaden ella communitad linguistica. El ei habels de producir e capir infinitamein biaras construcziuns differentas, gestas e novas, gie schizun talas ch'el ha aunc mai udiu. Igl affon empren pia buca il lungatg semplamein cun imitar quei ch'el auda en siu contuorn ed ambient. Co fuss ei schiglioc pusseivel che tuts affons emprendan la finala ina grammatica semeglionta, malgrad ch'els vegnan confruntai cun auters exempels de lungatg e vegnan en bia cass insumma buca instrui dals geniturs? Tenor las novas enconuschienschas sviluppescha igl affon sez siu lungatg en *moda creativa*, empalaus da certas habilitads internas dadas da natira. Co ei quei pusseivel?

Las empremas emprovas

Tgi ha buca gia viu in affon fagend las empremas experienzas cul lungatg. In process aschi natural, de mintga di, mo tuttina misterius. Mintga affon ei in cass per sesez, muossa atgnadads e porta surpresas. Las fasas distinguidas cheu ein perquei tuttavia buca absolutas, mobein sulettamein in cert numnader general. *Il s'emprems suns* digl affon da tetta – bargir, tgular, giblar, dar tschetschs culla lieunga – ein l'expressiun directa de certs affects e sentiments sco p. ex. mal, beinstar, fom. Quei repertori tonal fetg restrinschiu ei il bia accumpignaus de gesticulaziuns ualti mal-genglias, denton correspondantas. Aunc san ins per bia buca discuorer de lungatg, malgrad ch'ina certa communicaziun ei gia cheu. Il pignet s'encorscha numnadamein spert che siu sedeputar ha in cert effect. La mumma emprova d'eruir ils motivs dellas expressiuns de siu murli e cunta el, ri cun el, pren peda per el. Quei plai naturalmein ed il schani vul adina puspei danovamein contonscher quella attenziun. L'expressiun spontana survegn aschia senn e finamira, ella ei in appel che provoche-scha certas reacziuns.

Dal tierz al sisavel meins experimentescha il ragner en moda de giug adina novs suns e ha apparentamein plascher de sias invenziuns, repeatend ils suns novs cun perseveranza e mimica interessada. Quellas lallas (echolatia: ababababa/adadada/acacaca...) ein ordvart necessarias sco exercezis d'articulaziuns ch'ein la basa per mintga lungatg, tgeinin ch'igl ei. Ils pignets «exerciteschan» numnadamein era suns ch'existan buca el lungatg dils carschi (p.ex. grro, grra, grru sgargugliau enta culiez) ed activeschan plaun a plaun tut ils organs ch'ei drova per producir il lungatg. Mintgaton gartegia gia en quella fasa – ord pura casualidad – schizun in plaid e cun la *fantasia beinvulenta ed interpretonta de geniturs* san ins udir entirs monologs ord il sburbatem dil pign scheni de lungatg.

Denter il sisavel ed il dieschavel meins, avon ch'igl affon imiteschi ils emprems plaids dils carschi, san ins magari constatar plaids interessants che seresultan ord observaziuns dil pignet ed ein insumma buca imitadas ni formadas tenor plaids udi. Suenter haver tedlau inagada in'ura de bratsch repeteva in affon adina, cu el veseva e vuleva puspei udir quella, il plaid «ts»; in flum ed aua currenta fuvan per el in «fff» e tuttas caussas semegliontas ad in ballon (bal, lampion...) numnava el «pamfüt» («pam» forsa per fuorma rodunda e pleina e «füt» per la canera de schar giu l'aria?). Igl affon imitescha denton buca mo ramurs e caneras en atgna moda,

mobein scafflescha era per caussas che fan negina canera, ch'ins sa pia mo veser e palpar, plaids enzaco tipics e quasi simbolics per la fuorma ni il moviment della caussa numnada.


«pam»: tut quei che ha fuorma rodunda e sa schluppar

«ah»: caussas fetg grondas che fan impressiun

«tia»: tut quei che va spert (autos, utschals)

«fafa»: bia caussas ina sper l'autra (carrs de viafier, plunas lenna, uaul)

Talas tabellas ein naturalmein constructs fetg varionts. En realitat drova igl affon buca adina e logicamein ils medems suns per exprimer caussas cun semegliontas qualitads, pertgei sentiment, affect e situaziun han in'enorma influenza sil s'exprimer de quels pignets (far ded jester, lunas etc.). Il schema giusut muossa (semplificau) la via dalla caussa al plaid.



In fenomen el svilup digl affon de 12–14 meins illustrescha bein, co expressiun entras moviment ed expressiun verbala stattan atgnamein en stretga relaziun: *il mussar cul det* ni cul bratsch, ina habilitad resalvada al carstgaun. Igl affon stenda il maun ed il det anavon ed el medem mument vegn la lieunga stuschada combinatoricamein anavon encunter ils dents. Aschia vegn il «*dada*», «*tata*» (characteristicum dil *mussar* en biars lungatgs) declaraus e ha pia de far nuot cun talent special dil pignet pil lungatg tudestg («das da» enstagl «quei cheu») ni cun ina simpatia speciala per la «*tatta*» ch'ins savess udir ord quei «*dada*».

Construcziuns ded in plaid

All'entschatta dil secund onn (12–? meins) entscheiva igl affon plaunsiu ad empruar d'imitar plaids ch'ins plaida avon ni che stattan alla fin d'ina construcziun. Ils plaids vegnan alla entschatta aunc scursani sin ina silba ni sin in schema (1 vocal + 1 consonant + 1 vocal). Exempels: calzer = eze / capetscha = eta / auto = oda / combra = oa / stiva = ia. In plaid sa haver bia muntadas e sereferescha ussa cun ina certa regularitat sin

differentas caussas cun semeglionta fuorma e cun moviment paregliabel. Igl affon entscheiva pass per pass a construir in maletg della realitad ed el reveda e differenziescha continuadamein pli exact quei maletg cun abstrahar, associar, cumponer e cumpareglier.

«vau»: vala all'entschatta per tuts animals cun ina certa semegliadetgna, era per cauras e nuorsas etc.

«caca»: ei tenor l'experiensa de quels pigns tut quei ch'ins duess buca metter en bucca (l'enconuschienscha preserva denton buca els de tuttina empruar!).

«mam»: includa tut quei ch'ins sa magliar.

e.a.

In plaid ei denton era mintgamai ina entira construcziun. Tut tenor situaziun, tun della vusch, mimica e gestica sa il plaid «mama» p. ex. dir: «Mumma neu!» / «Quei ei la mumma» / «Mumma, jeu hai fom» / «Jeu hai mal» / «Jeu less ir giuado» etc.

Il svilup ei il bia buca linears, mobein semanifestescha plitost en differents stauschs. Tuttenina in di drova il pign gest 2–3 plaids novs e cun repeter ed udir quels en situaziun adattada (experiensa!) empren el plaunet la muntada exacta. Ils stauschs vegnan adina pli frequents e las purziuns de plaids e terms capeivels adina pli pulpidas. Igl ei clar, mo tuttina interessant de constatar, ch'il lungatg vegn *capius ditg avon che discruius*. Cun 16–18 meins han ils ragners il dètg plascher ded ir – sin damonda – en combra pils scalfins, per la locomotiva de lenn, per la puscha... Els san era gia fetg exact ed endinau tgei ch'els vulan e laian buca tgunsch menar davos la cazzola.

Construcziuns de dus plaids

Cun biebein 18 meins entscheiva igl affon plaunet a dùvrar cumbinaziuns de dus plaids. Ina analisa muossa *duas classas* de plaids che constitue-schan e structureschan quellas cumbinaziuns: ina pintga gruppa de plaids guidaders, aschinumnai operaturs, ed ina pli gronda classa de plaids gia empri e duvrai sco plaids singuls. Ina tala grammatica ch'ei buca ina copia dil lungatg dils carschi, mobein in agen sistem el lungatg digl affon, selai schematisar sco suonda:

<i>operaturs</i>	tutta (= letg)
fa (= fai!)	zola (= cazzola)
da (= dai!)	pop
cheu	ze (= calzer)
buc	cauld
Ac (Marc)	mamma
adaada	tatta
checheu (quel cheu)	pappa
dada (= quei cheu)	auto
eupi (= aunc pli)	aua
iu (= miu)	cacca
	...
	...
	(quella gruppa s'augmenta continuadamein)

Era talas construcziuns han naturalmein tut tenor situaziun (context) e tun della vusch differentas muntadas ed intenziuns e possibiliteschan gia ina bufatga communicaziun, surtut sch'il pign muossa aunc detschartamein cul det.

Denter dus e treis onns ein ils progress frappants. Ei reussescha pli e pli de tschaffar grondas parts della realitat el lungatg e quei cun ina spontanedad e creativitat singulara. Quella *fasa dellas damondas* senza fin e misericordia muossa tgei enorm basegns igl affon ha d'experimentar cul lungatg, de s'exprimer e ded emplenir ses arcuns de lungatg e savida cun informaziuns. Tgi? Tgei? Pertgei? Co? Cu? Epi tgei? Nua? Tgei lu? Mintgaton para il lungatg strusch de puder dar vau al catsch dellas damondas, «marveglias» ed impressiuns. Igl affon balbegia dil bia ch'el less dir. Quei balbegem e catsch ein denton en quella fasa apparenzas absolutamein normalas e setschessan da sez.

Ei semuossa adina puspei, co ils pignets han la facultad de sviluppar intuitivamein certas teorias sur dil lungatg e sia structura e co els modificheschan ed amplificheschan continuadamein quellas teorias. Mo in exempl:

La generalisaziun
In pop empren e drova igl emprem spargliadamein plaids sco «cuntials»,

«umens», «encuretg»... Tuttenina in di aud'ins denton «ils cuntis», «ils ums», «encuriu», «entscheviu» e quei en tutta seriusadad. Tgei ei succedi? Igl affon ha introduciu en sia grammatica interna duas reglas novas ch'ins sa schematisar linguisticamein sco suonda:

1. Plural = singular + s
2. Perfect = tschep dil verb + iu / au

Ins sa mo surstar dil senn linguistic digl affon per generalisar, per formar analogias e tschercar regularitads, mo ei sa – tier plaids duvrai darar – era cuzzar fetg ditg entochen ch'il pignet introducescha en siu sistem grammatical ina regla ch'entschaffa mintga irregularitat. Il senn per regularitad ei magari aschi exprimius ch'igl affon curregia schizun ils carschi sch'els drovan fuormas irregularas.

Ils suns, vocals e consonants

Sch'ins teidla ina pindella cun emprovas de lungatg d'in affon, registradas els emprems quater onns da sia veta, ves'ins pér dadretg las veras dimensiuns dil svilup linguistic e sa s'imaginar las difficultads. Mintga vocal e consonant para d'haver siu di de naschientscha. Ferton ch'ils vocals – ch'expriman gie las interjecziuns de mal, smarvegl etc. – ein d'udir gia els emprems sis meins, il bia cumbinai culs suns explosivs b, p, t, d, c, caschunan l, r ed ils suns sch, tg, gn, gl magari dètg grondas breigias. Suns distinctivs per la muntada vegnan empri e duvrai il pli spert, ferton ch'ils auters san spitgar (tiva, es (esch), tiier (taglier), pen (pegn), camuoz (camutsch). Entuorn 4 onns denton damogna igl affon normalmein era l'entira fonetica de siu lungatg. Igl ei remarcabel che las poppas discuoran en general pli baul pli bia e pli clar ch'ils pops. Studis empirics han mussau ch'igl affon empren bia pli spert ils suns, era ils grevs, sch'ins legia avon ad els texts interessants, era sch'els capeschan buca il cuntegn. Sper igl udir para surtut il veser a tschintschar d'haver ina gronda impurtonza.

«Lungatg mumma», lungatg della gruppa ed expressiun de sesez

Cons gronds poets raquentan de lur mummas che han aviert ad els egls ed olma e svegliau spért e fantasia cun mussar profundamein il lungatg! La mumma che discuora e scutina e conta e rispunda e raquenta e curre-

gia ei l'emprema impurtontissima scolasta de lungatg. Denton han era fargliuns e camerats de giug, lu la scoletta e pli tard la scola e gl'entir ambient in'eminenta impurtonza. Cul lungatg vegn igl affon socialisaus en sia gruppera. El empren plaids e lur muntada exacta ord situaziuns differentas e sto emprender de sedepurtar adequat al lungatg. Enzacu fa igl affon lu era persenn ch'ins sa dir «manzegnas» cun plaids, ch'ins sa flattar e smanatschar ed esser ferms etc., tut cun plaids, cun lungatg.

Aschia daventa il lungatg pli e pli la clav che arva egl e patratg per la realitad, mo el dat el medem mument era in tschuat informaziuns sur digl affon che discuora. *// psicolog* versau vesa ella tschontscha digl affon ina certa mesira per la madirezia spirtala e constatescha sviaziuns della constituziun psichica (balbegiar, bloccada el discuorer, absenza, munconza de concentratzion, tema, complex. . .). *// sociolog* enconuscha cuninagada la provegnientscha sociala dil plidader, sa pia dir, en tgei ambient igl affon ei carschius si e con fetg ins ha promoviu il svilup dil lungatg. *// linguist* concluda ord il dialect discuriu il liug de dimora (derivanza geografica) ed emprova de cattar ils tratgs characteristics dil lungatg digl affon insuma. E la finala lai il process d'emprender lungatg de mintg'affon sminar co ils emprems carstgauns han avon mellis e mellis onns entschiet a formar e sviluppar in lungatg che ha possibilitau decisivamein il progress della carstgaunadad.

Igl affon e *sieu* lungatg! Las expectoraziuns fatgas cheusura valan denton era pigl affon e ses lungatgs. Studis exacts e l'experienza quotidiana confirmen ch'in affon empren ella situaziun adattada senz'auter era dus ni treis lungatgs parallelmein. In mussament dapli per la habilitad singulara d'emprender lungatg. Pils Romontschs che ston viver cun dus lungatgs ina consolaziun.